

ISCARTA YA' SAN PABLO YATO TET MAKTA AYXAKO YUL ISQ'AB' KOMAM DIOS B'EY FILIPOS

Yicheb'anil iscarta ya' Pablo

1 ¹Hanin Pablo inti'an yeb' juxhta Timoteo, ischejab' Komam Jesucristo jehanh. Chikotz'ib'nhetojanh hune' carta ti' teyet hex yetexxa Komam Dios yeb' ayexxako yul isq'ab' Komam Jesucristo ay b'ey konhob' Filipos, yeb' tet eb'ya' anciano yeb' tet eb'ya' diácono. ²Yaq'ab' Komam Dios Mame yeb' xin Komam Jesucristo isk'ulch'anil isk'ul yeb' xin aq'ank'ulal teyet.

Istxah ya' Pablo yinh makta ayxako yul isq'ab' Komam Jesucristo

³Hunta el chexitit yul ink'ulan, kaw chiwaq'an yuch'andiosal tet Komam Dios teyinh. ⁴Yet chintxahlihan tet Komam Dios, kaw chitzalakanano ink'ulan inq'annihan isk'ulal isk'ul Komam teyib'anh hunun hex. ⁵Yuto ha' hunexpaxo chexkolwa hepujb'anik'o Tzoti' yet kolb'anile jintajanh, yettaxtik'a heyeniko heb'a yul isq'ab' Komam Jesucristo masanta tinanh. ⁶Kaw t'inhan wehikojan tato haka' yu yicheniko Komam Dios ismunil teyinh, hak tu' chu islahniko kexiswax'eniko yinh isk'ulal masanto yet chihul Komam Jesucristo hunelxa.

⁷Kaw yilaltik'a innanihan haka' ti' teyinh hesunil, yuto kaw xahan ay hex wuhan, yeb' xin ha' hunex chexkolwa winhan yinh hune' munil aq'b'il wetti'an yu Komam, hak tu' xin ha' hunex chechah isk'ulch'anil isk'ul Komam. Chexkolwa winhan waxanhka ayiniktojan yul preso maka yet chinokan sata eb'naj yahawil yu inkolnihan hune' tzoti' yet kolb'anile ti' kat walnihan ta kaw yeli. ⁸Kaw yohta Komam Dios ta kaw xahan ay hex wuhan hesunil, hakojtam Komam Jesucristo chexxahannheni.

⁹Kaw chinq'anpaxojan tet Komam Dios yinh intxahan tato kaw ek'na xahan cheyil heb'a hunun hex yeb' ta kaw chiyaq' Komam hehelanil yeb'

henab'al. ¹⁰Yunhe heyohtanhen hesaynilo b'aytet kaw k'ul, hak tu' xin kaw k'ulnhetik'a tzet cheb'eyb'alnhe, haxinwal machi istx'ojal chi'ilchalo teyinh yet chihul Komam Jesucristo. ¹¹Yeb' xin sunil isk'ulal chitit yinh Komam Jesucristo ayexiko heb'eyb'alnheni yunhe isb'ina Komam yeb' yu yokpaxo ismay Komam.

Matxa weto hinb'ahan yetxa Cristo wehan

¹²Hex wuxhtaj, hex wanab', chiwochehan cheyohtanheloj tato hunteq'an isya'tajil chiwilti'an chikolwa yinh ispujb'alaxik'o Tzoti' yet kolb'anile. ¹³Kaw sunil mak ay yul palacio yeb' sunil anma ohtanheni ta ayinikojan preso isyayil ischejab' Komam Jesucristo wehan. ¹⁴Hayet yil-laxi ta preso wehan, kaw tzetk'a eb'naj juxhta yihti yanma ispujb'anilto Tzoti' yet kolb'anile. Kaw matxa chixiw eb'naj yalnik'oj yuto kaw yako eb'naj Komam Dios Jahawil yipo yanma.

¹⁵Walka xin yinh kaw yeli, ay mak chihalni Istzoti' Komam Cristo yu chichiwa isk'ul winhan, kat xin ispalk'on wib'anhan chiyute isnahni. Aypaxo xin eb'naj juxhta ti' k'ul tzet nab'il yu yuxinto chiyalik'oj. ¹⁶⁻¹⁷Ay mak chihalnik'o Istzoti' Komam Jesucristo yu ay tzet chiyochekej, mach kaw yelo isk'ul chiyalnik'oj, yuto choche yaq'a'ko yaq'b'il isya'tajil wib'anhan yulb'al ayiniktijan yul preso ti'. Aypaxo mak xin chalik'o yinh sunil yanma, kaw xin yohtaj tato ayinikojan preso ti' yu inkolnihan Tzoti' yet kolb'anile yakano Komam Jesucristo koxol.

¹⁸Yaja' machi wokan yinh ta k'ul nab'il yu eb'naj maka mach xin, tanhe chihal-laxik'o Istzoti' Komam Jesucristo; wal xin kaw chintzalahan yu chihal-laxik'o Istzoti' Komam.

Yaj xin kaw ek'b'alto chintzalahan, ¹⁹yuto wohtajan tato yu chextxahli winhan yeb' yu iskolwal Yespíritu Komam Jesucristo winhan, hunteq'an ti' chikolwa kiniskolnihan. ²⁰Yaja' ha' hune' chiwochehan yeb' ayko yinh wanmahan, tato mach chinkanan yinh tx'ixwilal, wal xin to ha' intzotelan yinh sunil wanmahan haka'tik'a yet yalanhtokanoj. Waxanhka itzitz hinan maka chin-kaman chiwochehan ta chi'il-lax isk'ulal Komam Jesucristo winhan. ²¹Yuto yulb'al yet itzitz hinan, hanhk'anhe ismunil Komam Cristo ayko yinh wanmahan inwatx'enan; taka chinkaman xin ek'b'al kaw k'ul chinelikojan. ²²⁻²³Yuxin tato yet itzitz hinan yinh inchib'ehalti'an, chiyu immunlahan ninoxa yinh ismunil Komam Jesucristo, yuxin kaw mach wohtajojan b'aytet wal insayni-lojan xol kab'eb' ti'; yuto ay wala'an tato chinkamnahan, kat intohan isk'atanh Komam Jesucristo, yuto ek'na k'ul hune' tu'. ²⁴Yaja' xin, kaw yilal itzitz hinan hanik'oxa yul sat yib'anhq'inal ti' yu immunlahan texol.

²⁵Kaw xin t'inhan wehan yinh ti', tato chitokinehayojan texol yu inkolwahan teyinh hech'ib'i, yeb' yunhe kam heyab'en tzalahilal, yu xaheyayto yul heyanna yinh Komam. ²⁶Hayet chinapnihan tek'atanh hunelxa, cheyaq' tzalaho hek'ul yinh Komam Jesucristo.

²⁷Hach kachannhe chiwaltojan teyet tato cheyako yinh hek'ul he-b'eyb'alnhen haka' kuyb'anile aykano jet yu Komam Jesucristo. Hak tu' xin waxanhka chintohan kexintukle'an maka machoj, chiwochehan wab'ehan heq'umal hesunil tato kaw tohol heyehikoj, yeb' xin tato kaw hun chiyu hemunlahi, yeb'paxo xin lahan helahniko hesunil heyaniko heyanna yinh Tzoti' yet kolb'anile, ²⁸yeb' xin mach chexxiw tet eb'naj kaj chexilni. Hak tu' chiyu isyenilo isb'a tato chik'aykanto eb'naj tu' yinh hunelnhe, yeb'paxo xin hak tu' chu heyeniloj tato ayxa hekolb'anil yu Komam Dios. ²⁹Yu isk'ulch'anil isk'ul Komam Jesucristo xayaq' jet, maxnhhetaj janiko janma yinh, ha' wal juni, wal xin yilal jaq'ni kab'o kob'a jab'en isya'tajil yinta Komam. ³⁰Hex ti', hunlahan heyaq'ni heyip helinhb'an heb'a xol isya'tajil haka' inti'an. Kaw xaheyila tato kaw waq' wanmahan inlinhb'an hinb'ahan xol isya'tajil texol, tinanh xin lanhan heyab'eni tato hune'nhe ha' waq'ni wanmahan xol isya'tajil.

Jiq'aweyo kob'a haka' yu yinayo isb'a Komam Jesucristo

2 ¹Yuxin ta chexyiptze Komam Jesucristo, ta chaq' Komam yaq'lo-b'al hek'ul yu xahan ay hex yu, yeb' ta hunxanhe heye yu Komam Espíritu Santo, yeb' ta xahan cheyil heyet anmahil, kat istz'aypaxo hek'ul yinh; ²ta hak tu', ayojab' tzalahilal texol, hunlahannhehojab' cheyute hexahannhen heb'a. Hunlahannhehojab' cheyute heyanna yeb' hunxanh-ehojab' tzet chi'ek' yinh henab'al; hak tu' xin kaw chititkano tzalahilal yul wanmahan heyu.

³Machojab' yu hepalk'on yib'anh hunuxa mak, yeb' yu yok hewinajil yuxin chewatx'e hunu tzet ye tu', machoj, wal xin chewla winaj cheyute heb'a. Ek'b'alojab' yelapno eb'naj juxhta teyib'anh cheyab'e. ⁴Machojab'-nhetaj isk'ulal teyinh chesayik'oj, wal xin yilal henanipaxti eb'naj juxhtaj.

⁵Lahanojab' cheyute henab'al haka' isbab'al Komam Jesucristo.

⁶Waxanhka lahan Komam Jesucristo haka' Komam Dios, yaj matzet yal isk'ul Komam yinh yehob'al.^a

⁷Wal xin isb'ejkano Komam sunil tzet yet Komam yehi, yaniko isb'a Komam chejab'oj yet ispitzk'a yul sat yib'anhq'inal ti'.

⁸Anma yu yulik'o Komam koxol, yinayo isb'a, kaw xin yijem yutepaxo isb'a Komam masanta yinh iskamikal, waxanhka kaw tx'ixob'al hune' kamikal yinh te' kulus tu'.

⁹Yuxin kaw aq'laxkano yip, yilaxkanh yu Komam Dios, yaniko Komam hune' isb'i Komam Jesucristo tu' ek'b'al yelapno yib'anh sunil b'ihe.

¹⁰Yuxin hayet chihal-lax isb'i Komam Jesucristo kaw chi'ay jahno sunil mak ay yul satkanh,

^a 2:6 Jn. 1:1-3; Col. 1:15

yeb' mak ay yul sat yib'anhq'inal ti', yeb'paxo mak ayayto yalanh tx'otx'.

¹¹ Kat xin yalni yu isti' tato ha' Komam Jesucristo, ha' kaw Yahawil yekanikoj, hak tu' xin chu yok ismay Komam Dios Mame.^b

**Anma ayxako yul isq'ab' Komam Jesucristo
kaw haka'xa issajilq'inal yehi**

¹² Yuxinto hex wuxhtaj hex wanab', hex kaw xahan ay wuhti'an, yet ayinan texol kaw yijem cheyute heb'a, hakojab' tu' xin yet machijinan texol kaw ek'nahojab' yijem cheyute heb'a. Aweko yinh heyanna hexiw tet Komam kat helinhb'an heb'a yinh hekolb'anil. ¹³ Wal xin, ha' Komam chi'aq'ni oko yinh heyanna tzettaj isk'ulal wal heyuni, kat xin iskolwaxo teyinh yunhe yijni isb'a haka' choche isk'ul.

¹⁴ Watx'ewe sunil yaj mach chexaq'wi k'u'le, machika xin tzet chey-alpaxoj yet chewatx'eni. ¹⁵⁻¹⁶ Hak tu' xin, machi mule yeb' istx'ojal chi'ilchalo teyinh yu anma, wal xin to kaw yuninal Komam Dios cheyute heb'a. Ek'anhwe yinh isk'ulal xol anma machiswalil yeb' kaw tx'ojkanoj. Wal xin kaw chextzejla xol anma haka' istzejla tx'umel xol q'ejholo, yuto hex cheyalik'o Istzoti' Komam Dios chi'aq'ni q'inale tet anma. Hak tu' xin yet chul Komam Jesucristo kaw chiwab'ehan tzalahilal teyinh, yuto kaw wohtajan tato mach nab'nheho kinek'an texol, yeb' xin mach nab'nheho kinmunlahan texol.

¹⁷ Waxanhka xin kaw chiwako innimanilti'an xahanb'alil, yunhe istz'ajnakano xahanb'al cheyaq' tet Komam Dios yu heyanna yinh Komam, kaw chintzalahan kat inpohniltojan hune' tzalahilal ti' texol. ¹⁸ Tzalahanhwepaxo hex ti', aq'we tzalaho hek'ul wintajan yinh b'ay chintzalakoti'an.

**Yal ya' Pablo ta chato ya' naj Timoteo yeb' naj
Epafrodito ilwal yinh eb'naj juxhtaj**

¹⁹ Tato kaw chi'el yinh isk'ul Komam Jesucristo Jahawil chito naj Timoteo kexistukle' yet hekal kab'e ti' haka' chiwochehan, yunhe yilni naj hanik' heyehikoj kat yiniti naj tzoti' wetan. Hak tu' chu istzalahankh ink'ulan yet chiwab'ehan hanik' heyehi. ²⁰ Yuto hanhk'anhe naj Timoteo ti', lahan istxumni haka' inti'an, yeb' xin chako yinh isk'ul iswatx'en isk'ulal teyinh. ²¹ Yaj wal hunteq'anxa eb'naj xin, ha' tzet choche isk'ul eb'naj chissaya, maxhtaj tzet choche Komam Jesucristo. ²² Wal hex hex ti', heyohtaxa hanta isk'ulal chiyute isb'a naj Timoteo ti', yeb' xin ta kaw chikolwapaxo naj wintajan yinh jalnik'ojanh Istzoti' Komam Jesucristo.

^b 2:11 Is. 45:23

Haka' iskolwa hunu naj k'ahole yinh ismam, hak tu' iskolwa naj winhan. ²³Yuxin toxanhe chiwechmahan tzet chinelikojan yinh hune' isya'tajil ayayo wib'anhti'an, kat wanitojan naj kexistuklenoj. ²⁴Yaj xin chikawxi ink'ulan yinh Komam Dios tato chintopaxojan kexwila'an yinh lemb'il.

²⁵Chi'ek'paxo yinh innab'alan tato kaw yilal wanipaxtojan naj Epa-frodito kexyila'. Naj juxhta ti', kaw chikolwa naj wintajan yinh ismunil Komam Jesucristo, yeb' ha' hun naj chi'aq'len isya'tajil wintajan. Naj juxhta ti', hex heyati naj kolwal winhan. ²⁶Wal xin kaw choche naj isto kexyila' hesunil, kaw xin ayko yinh isk'ul naj teyinh yuto heyab'eloj tato yab'i'ay naj. ²⁷Wal tu', kaw yeli yab'ilni naj, hanik'xanhe mach kam naj. Yaj xin kaw oq' isk'ul Komam Dios yinh naj, iskawxikanh naj. Yaj kaw maxhnhetaj yinh naj oq' yanma Komam, kaw tz'aypaxo isk'ul Komam winhan, yunhe matxa kam chislahiko b'isk'ulal winhan yu naj.

²⁸Yuxin matxa chi'ek'ayo yet inchejnitojan naj tek'atanh, haxinwal chextzalakanh yet cheyilni yapni naj hunelxa. Yu hetzalahilal yinh naj chipax hanik' inb'isk'ulalan. ²⁹Chahwe naj yinh tzalahilal yuto kaw heyuxhta naj yinh Komam Jesucristo. Kaw xahanojab' cheyil mak haka' naj ti'. ³⁰Yuto yu ismunil Komam Jesucristo, yuxin etza kam naj. Kaw ishin isb'a naj iskam winhan heseleloj, yuto kaw nahat ayexilo winhan.

Ha' tzet kaw ek'b'al yelapno yehi

3 ¹Wal tinanh hex wuxhtaj, hex wanab', tzalahanhwe yinh Komam Jesucristo Jahawil. Haninti'an, mach tx'ojo chiwab'ehan intz'ib'-nhentojan tzettaj ye tu' xatik'a intz'ib'nhetojan teyet, wal xin kaw ch'okniko heyu.

²Kaw nannhe heyu tet eb'naj kaw lahlonnhetik'a yek' haka' metx tx'i', hanhk'anhetik'a ismachiswalilal chiswatx'e, kat yalni ta kaw yilal chi'ok hune' circuncisión yinh konimanil. ³Hanhonh ti', yinh kaw yeli circuncidadoxa je yul sat Komam Dios, yuto chijiyo kob'a tet Komam Dios yu yip Komam Espíritu Santo. Chonhtzalahi yuto yetxa Komam Jesucristo jehi, maxhtaj yinh ej yechel ch'ok yinh konimanil b'ay chikawxi kok'ul.

⁴Haninti'an wal waniko wanmahan yinh hunteq'an chileyal eb'naj tu', yuto kaw tz'ajan inwatx'ehan sunil tzet chal isley ya' Moisés. ⁵Yuto waxaje-b'ixto tz'ayik inpitzk'ahan waq'lax circuncidaran. Kaw Israel wichmaman, yinh yuninal ya' Benjamín titnaj hinan, hebreo hinan, kaw hebreo inmaman yeb' inmi'an, fariseo inpaxojan yinh walnik'ojan kuyb'anile yinh isley ya' Moisés. ⁶Kaw ayko wanmahan yinh kuyb'anile tu', yuxin kinokan inkaja'an makta ayxako yul isq'ab' Komam Jesucristo, kaw xin inyijehan ley tu', kaw machi hunu mak chu yalni ta mach tz'ajano yu inyijen.

⁷Yaja' sunil hunteq'an aykano yelapno ye yul insatan yet yalanhtokano tu', tinanh matxa tzet chalilo yul insatan, yaj yu Komam Jesucristo. ⁸Yinh kaw

isyelal, sunil hunteq'an tu', kaw matzet chi'okniko wuhan tinanh; ha' hune' kaw aykano yelapno yehi, ha' yinh kaw wohtanhenilojan Komam Jesucristo Jahawil. Sunil hunteq'an b'ejb'ilkano wuhtu'an xin kaw haka'xa q'alem ye yul insatan, yu inchahnihan hune' inmajulan yinta Komam Jesucristo, ⁹hak tu' xin hunxanhe chiwukanojan yeb' Komam. Tinanh xin, k'ulinan yul sat Komam Dios, yuto wako wanmahan yinh Komam Jesucristo, mach yuho injenan tzet chal isley ya' Moisés. Kachannhe yu janiko janma yinh Komam Jesucristo chonhok k'ulal yul sat Komam Dios. ¹⁰Hak tu' xin chiwohtanh-ehan Komam Jesucristo, kat wab'enan yip Komam Dios yinh wanmahan, hune' yip Komam pitzk'ankanh Komam Jesucristo xol kamom. Yeb' yu waq'lenan isya'tajil haka' yaq'le Komam, yeb' inkaman haka' yu iskam Komam. ¹¹Chikawxipaxo ink'ulan ta chinitzitzb'ikanhan xol kamom.

Yet chijinati janma japni yinh hune' b'ay nab'ילו ju

¹²Kaw mach lanhano walnihan tato kaw xatzujcha sunil hunteq'an ti' wuhan maka kaw tohol inxahan, wal xin kaw lahb'iliko wuhan intohan insatajan. Ayko yinh wanmahan intzujnayojan hunteq'an nab'il winhan yu Komam Jesucristo yet kinistzujnayojan b'ab'el. ¹³Hex wuxhtaj, hex wanab', mach lanhano walnihan tato xatzujcha apno hunteq'an tu' wuhan, yaja' ha' hune' chiwutehan tinanh kaw matxa chinnatijan hunteq'an inwatx'ehan yet yalanhtokanoj; chiwaq'ni wanmahan intzujnayojan hunteq'an ayko insatajan. ¹⁴Hak tu' xin chu istzujcha apno wuhan, kat yaq'lax hune' matan wetan, hune' b'ay awteb'ilonh yu Komam Dios, yuto hunxa je yeb' Komam Jesucristo.

¹⁵Yuxin sunilonh ayxa yip janma yinh Komam, yilal kotxumni haka' tu', yaja' ta ay hunujex nan chu hetxumniloj, ha' Komam Dios chiyenopaxilo teyet. ¹⁶Yaja' ha' hune' kaw yilal, ek'ojonhwe yinh hunteq'an tzet xatzujcha apno ju.

¹⁷Hex wuxhtaj, hex wanab', ilweto hewatx'en haka' inb'eyb'alan yeb' isb'eyb'al makta chib'elwi haka'tik'a yu koyenikanojanh teyet. ¹⁸Ay hune' tzet ti' tx'i'al elxa chiwalan teyet. Tinanh xin kaw chinoq'an chiwaln-paxtojan teyet tato kaw tzetk'a eb'naj ayko ishawal yinh kuyb'anile yinh iskamikal Komam Jesucristo yinh te' kulus. ¹⁹Hunteq'an eb'naj tu' chitokano eb'naj yinh isya'tajil, kat istanhkaniloj, hanhk'anhe isnoh isk'ul ayko yinh isnab'al, ha' xin kaw aykaniko isdiosalo eb'naj. Kaw xin chitzala eb'naj iswatx'en tzettaj kaw tx'ixob'al, yeb' xin hanhk'anhe tzettaj ye tu' ay yul sat yib'anhq'inal ti' ayko yinh isnab'al. ²⁰Wal hanhonh ti' xin yetxa satkanh jehi. Lanhan jechman yayilo Kokolomal yul satkanh, ha' ton Komam Jesucristo Jahawil. ²¹Ha' Komam chihelni hune' konimanil machi yip ti', haka' xin isk'ulch'anil isnimanil hak tu' chonhelikoj. Yu ishelanil Komam yuxin chishel konimanil, ha' ton hune' ishelanil tu' chimunla yib'anh sunil tzet ay yul sat yib'anhq'inal ti'.

Tzalahanhwe yinh Komam Jesucristo Jahawil

4 ¹Yuxin hex wuxhtaj hex wanab', kaw xahan ay hex wuhan. Kaw ay wala'an chiwilikojan teyinh tinanh, kaw istzalab'al wanmahan heyehi, yeb' xin ispajpaxo inmunitan heyehi. Kaw chelahweko xin, toholjab' cheyute heb'eyb'al yinh Komam Jesucristo.

²Chiwaltojan tet janab' Evodia yeb' xin janab' Síntique tato kaw yilal yok eb'ix yinh aq'ank'ulal, yuto kaw isnohxa isb'a eb'ix yinh Komam Jesucristo. ³Yeb'paxo xin, hach wuxhta wet munlawomal kaw yijem, chinq'anan tawet chaxhkolwa yinh eb'ix janab' ti', haxinwal chi'ok eb'ix yinh aq'ank'ulal, yuto kaw kolwa eb'ix winhan yalnik'o Tzoti' K'ul yet Kolb'anile xol anma; yeb'paxo juxhta Clemente kaw kolwa wintajan, yeb' hunteq'anxa eb'naj juxhtaj. Eb'naj tu' tz'ib'nheb'ilxayo isb'i eb'naj yul te' hum b'ay ayayo isb'i makta ayxa isq'inal mach istanhb'al yinh Komam Jesucristo.

⁴Tzalahanhwe yinh Komam Jesucristo Jahawil sunilb'al tiempo. Chiwalnipaxojan hunelxa, ¡tzalahanhwej! ⁵Kaw k'ulch'anojab' hek'ul yul sat sunil anma. Hanik'xanche tiempohal kat yul Komam.

⁶Machojab' tzet kaw cheyako yinh hek'ul. Halwe sunil tzet cheyoche tet Komam Dios yinh hetxah, q'anwe tet Komam kat xin heyaq'nipaxo yuch'andiosal tet Komam. ⁷Hak tu' xin chiyu yaq'ni Komam Dios aq'an-k'ulal teyet. Hune' aq'ank'ulal tu', kaw ek'b'al sata hanta tzet chiyu istxumchalo yu anma. Hune' aq'ank'ulal tu', ha' chik'ub'an heyanna yeb' xin henab'al, yuto kaw hunxa heye yeb' Komam Jesucristo.

Aweko henab'al yinh tzettaj kaw k'ul

⁸Tinanh xin, hex wuxhtaj hex wanab', aweko henab'al yinh sunil tzet kaw t'inhan yehi, yinh sunil tzet ay yelapno yul kosat, yinh sunil tzet kaw tohol, yinh tzet mach iskistalil, yeb' yinh sunil tzet kaw yeli, yeb' yinh sunil tzet chijoche jab'e', yeb'paxo yinh sunil tzet kaw k'ul yul sat Komam Dios, yeb' hunteq'an kaw istzan yal-lax k'ul-la tzoti' yinh; ha' yinh hunteq'an tu' cheyako henab'al. ⁹Yijewe hunteq'an kuyb'anile yeb' chejb'anile waq'an teyet, yeb' hunteq'an tzet heyab'e walnihan, yeb' tzet heyil inwatx'enan. Ta chewatx'e haka' tu', chi'ok Komam Dios heyetb'ihoj, chiyaq'nipaxo Komam aq'ank'ulal teyet.

Hunteq'an kolwal yato eb'naj juxhta tet ya' Pablo

¹⁰Wal tinanh xin, kaw chintzalahan yinh Komam Jesucristo Jahawil, yuto kinhenatijan heyantiti hekolwal wetan. Mach lanhano walnihan ta xakinhenahulnhetojan, ¡machoj! Wal xin ayinnhetik'akojan yinh henab'al, yaj tonheton yumi machi yu hekolwa winhan. ¹¹Wal xin, maxhtaj yu kaw matzet ayinan yuxin chiwaltojan hune' ti' teyet, machoj; wal xin

q'aynaj inxahan waq'ni tzalaho wanmahan yinh tzet ay yul inq'ab'an.

¹²Wohtajan wijlenan isya'tajil, ay tiempo machi nich'ano tzet ayinan, ay-paxo tiempo kaw k'ul chi'ek' wila'an. Wohtajan wijlenan wahil, aypaxo tiempo nohnanhetik'a ink'ulan, aypaxo tiempo ay inmelyuhan yeb' ay tiempo machipaxo inmelyuhan, yaja' q'aynaj inxatik'ahan yinh sunil.

¹³Sunil chisje wuhan, yuto ha' Komam Jesucristo chi'aq'ni wipan. ¹⁴Yaja' hex ti', kaw k'ul tzet hewatx'e yuto kexkolwa winhan yet ayinikojan yinh hune' isya'tajil ti'.

¹⁵Yet welan yul ismajul Macedonia, yet wichenikojan walnik'ojan Tzoti' K'ul yet Kolb'anile yul hunteq'anxa nan konhob'al, hanhk'anhe hex ay yul isq'ab' Komam b'ey yul konhob' Filipos kexkolwa winhan. Ha' ton tu' heyaq' ispajo wetan, yuto hechah kolb'anile yu inmunilan texol. Wal hunmajanxa eb'naj ayxako yul isq'ab' Komam yul hunteq'anxa konhob' b'ey tu', matzet yaq'a. ¹⁶Yeb'paxo yet ayinan b'ey konhob' Tesalónica, kayel oxel heyato hekolwab'al wetan, yu yok yinh tzet chi'okniko wuhan. ¹⁷Maxhnhetaj inchahnihan hekolwab'al ayko yinh innab'alan, wal xin kaw chintzalahan yuto ek'b'alto chi'aq'lax ispaj selet teyet yu Komam Dios.

¹⁸Yuxin kaw nimanxa tzet chinchahan teyet, kaw xapalk'oni. Sunil tzet heyati wetan yinta naj Epafrodito, k'uxanxa. Kaw k'ul hune' tu' yul sat Komam Dios, yuto haka' isxuq'al sam hunu xahanb'al chi'aq'lax tet Komam, kaw xin chitzala Komam yinh, hak tu' issaq'alil hune' hekolwab'al tu'. ¹⁹Ha' Komam Dios xin chi'aq'ni sunil tzet matzet yul heq'ab', haka'tik'a isk'ulch'anil isq'alomal ay yinh Komam Jesucristo.

²⁰Ayojab' yelapno isb'i Komam Dios yinh sunilb'al tiempo. Ha' ton Komam, Mame jinh kosunil. ¡Hakojab' tu'!

Yalto ya' Pablo ta chil isb'a makta ayxako yul isq'ab' Komam

²¹Chiwaltojan teyet cheyil heb'a yinh hekawil hesunil hex yet hexxa Komam Dios b'ey tu', hex hunxa heye yinh Komam Jesucristo. Chalpaxto eb'naj juxhtaj ay ink'atanhan ta cheyil heb'a yinh hekawil. ²²Chalpaxto sunil mak yetxa Komam b'ey ti' ta cheyil heb'a yinh hekawil, yeb'paxo xin eb'naj juxhta chimunla yinta naj yahaw Roma ti'.

²³Yaq'ab'ayo Komam Jesucristo isk'ulch'anil isk'ul teyib'anh hesunil.